

Gobierno ta implementando maneho mas estricto pa admision di extranhero

Segun Gobernador

Awemainta. - (diabierna 15 September 2006). p. 9

Gobernador Freddis Refunjol a enfoca den su discurso riba maneho di admision di stranhero.

El a bisa cu mirando cu lo tin un gran cantidad di actividad den construccion pa e añanan venidero pa loke ta trata hotelnan, e demanda di labor for di exterior lo sigui existi, cautela ta na su lugar pasobra tur aña tin mas hobennan for di scolnan cu lo mester forma parti di nos mercado laboral.

Gobernador a expresa cu ta pa e motivo ey gobierno ta implementando un maneho integral mas stricto pa admision di stranhero, primeramente pa cumpli cu e necesidad di cierto profesion specifico. Fuera di manpower planning eseyi ta rekeri tambe un bon sincronizacion entre enseñansa y e necesidadnan di sector laboral. Gobierno lo introduci un programa mas amplio di educacion adulto pa asina duna mas persona e oportunidad pa nan por hisa nan nivel di educacion basa ariba e necesidadnan den nos comunidad.

Tanto Educacion Profesional Basico como Educacion Profesional Intermedio ta haci regularmente sondeonan pa adapta estudionan na e necesidadnan di nos mercado laboral.

Pa esnan cu tin problema pa subi mercado laboral, un proyecto a wordo lanza door di Departamento di Labor, Departamento di Asuntonan Social y Enseñansa pa Empleo pa integra nan den mercado laboral. E obhetivo ta pa duna specialmente hendenan cu ta ricibi onderstand e posibilidad pa reintegra den mercado laboral, dunando nan hermentnan necesario pa nan por haya y mantene empleo.